

# Txirritola

ARAMAIO / Barikua / 2004ko maiatzaren 14a / 108. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

## Gazte ugariren artean osatu dute Aramaioko gazteen taldea

U.M.

Gazte mordoak bat egin du Aramaion sortu berri den gazte-taldearekin. Aramaixo Tropikaleko Gazte Asanblada (ATGA) izena ipini diote talde horri. Horrenbeste gazte elkartu direla-eta, orain, lokala eskatuko diote Udalari, batzarrek eta ekimenak egiteko.

50 bat gazte hasi da lanean Aramaixo Tropikaleko Gazte Asanbladan. Horrek arazoa sortu die. Izan ere, orain duten lokalean, kultura etxekoan, ez dira kabitzen. Eta edozein ekimen egin behar dutela ere, Udalari zinema-aretoa erabiltzeko baimena eskatu behar diote. Gauzak horrela, ATGAK egin zuen azkeneko batzarrean erabaki zuten, beste gauza batzuen artean, beste bilgune bat eskatu beharko diotela Udalari.

### UMEEKIN ANTZERKIA

Horrez gainera, eta Udalarekin elkarlanean, herriko San Martin jaiak antolatzen dabilta gazteak buru-belarri. Aurreikusitako aurrekontua dezente murrizta dela-eta, ekimen bereziak antolatzen dabilta, jai alternatiboak



Aramaioko 50 gaztek bat egin dute Aramaixo Tropikaleko Gazte Asanbladarekin.

izateko eta dituzten errekurtsioak ahalik eta ondoen aprobetxatzeko. Hala, gazteendako musika-kontzertuak antolatuko dituztela, eta antzerki berezia antolatzen dabiltzala aurreratu digute. Antzerkiari dagokionez, herri eskolako umeekin lanean dabilta horretarako. Horrez gainera,

herriko elkartei gutuna bidali die jaiak antolatzen laguntzeko.

### HARREMANAK SENDOTU

Oro har, euskara lantzea eta herriko gazteen arteko harremana sendotzea da Aramaixo Tropikaleko Gazte Asanbladaren helburua. Horrez gainera, herriko elkarte-

ekin harremana sendotzeko ere ahalegin berezia egingo dute.

### BESTELAKOEN LAGUNTZA

Gazteek Arrasateko gaztetxearen eta Otxandioko gazte taldearen laguntza dute bai taldea osatzeko, bai eta jaiak antolatzeko ere. Haiei eskerrak eman gura dizkiete.

## Laster, esaera zaharren bertso lehiaketa izango da

U.M.

Txirritola Euskara Elkarteak ekimen berezia antolatu du datorren maiatzaren 21erako: esaera zaharren bertso lehiaketa. Bizkaian egiten den ekimena da, hemen sekula egin ez dena. Polita izan daitekeelakoan erabaki dute Aramaion gitea.

Algorta inguruan egiten dute esaera zaharren bertso lehiaketa. Zera da: ekimenean parte hartu behar duten bertsolariei esaera zaharren zerrenda ematen zaie. Bertsolariek euren artean banatu behar dituzte esaera zaharrok. Eta gero, bertsoen bitartez, esaera zaharrek banan-banan adierazi

behar dituzte, bestelako herritar talde batek esaera asmatzeko.

Ekimen horren berri izan zuen aramaioarren batek, eta hona ekaritzea polita izango delakoan erabaki dute herrian antolatzeko. Inguruan halako zerbitu antolatzen duten aurreneko aldia da.

### TABERNAZ TABERNA

Hala, Aramaioko kasuan, 19:00etan hasiko dute ekitaldia. Herriko bertso eskolakoek, herritarrek eta trikitilariak parte hartuko dute ekimenean. Bertso eskolako kasuan, bi talde osatuko dituzte eta tabernaz taberna ibiliko dira, tokatu zaizkien esaera zaharrek bertsoen bitartez esaten. Trikitilarien laguntzarekin egingo dute ibilaldia.



Herriko trikitilariak ere parte hartuko dute esaera zaharren lehiaketan.

## LABUR

### Osoko batzarra izango da datorren astean

Datorren asteko osoko bilkuran landuko dituzten gaien artean, besteak beste, ekainaren 13ko hauteskundeetan lanean jardun behar duten aramaioarren izenak zozketa beharko dituzte. Betiko moduan, hauteskunde zentro bakarra izango da Aramaion: San Martin Eskola. Eta han bi hauteskunde-mahai ipiniko dituzte. Mahai bakoitzeko presidente bat, bi bokal eta haien ordezkioak aukeratu beharko dituzte. Beraz, bi mahaietarako, bederatzi lagunen izenak atera beharko dituzte. Herritar horiek berehala jasoko dute abisua, eta gero, zazpi eguneko epea dute erreklamazioak egiteko.

### Lau t'erdiko ETB kantxa lehiaketako partidu gehiago

Gaur, barikua, Lau t'erdiko ETB kantxa txapelketaren barruko partidu gehiago jokatuko dituzte herriko kiroldegian. 21:00etan hasiko dira. Hala, kadete mailan, Urrizalkik Martinezen aurka jokatuko du eta Peñasek Mendizabalena kontra. Eta 23 urtetik beherakoek artean Urrizalkik Castilloren kontra jokatuko du eta Erreak Landaren kontra.

### Eskola arteko bertsolari txapelketetan buru-belarri

Batetik, bihar, zapatua, Aramaioko bertso eskolakoek saioa egingo dute Uribarriko elkartearen, afalostean. Arabako Eskola Arteko Bertsolari Txapelketaren bigarren kanporaketa izango da. Bestetik, datorren maiatzaren 22an, zapatua, 14 urtetik beherakoek izango dute eskola arteko bertsolari txapelketan parte hartzeko aukera. Legutianon izango da lehia, kultura etxean. Hain zuzen ere, idatzizko bertsoen txapelketako finala jokatuko dute 40 bat umeek.

**TELEFONOJAKINGARRIAK**

**OSASUNA / LARRIALDIK**

Osasun etxea (txandak)	945 44 53 40
Botika	945 44 50 03
Udaletxea	945 44 50 16
Ertzaintza (Arrasate)	943 79 71 99
Gurutze Gorria (Legutio)	945 45 52 52
San Martin Eskola	945 44 50 04
Taxia eta autobusak	945 44 50 33
Udal kiroldegia	945 44 53 35
Postetxea	945 44 50 83
Zuiako Eskualdea	945 43 01-67
Suhiltzailleak (Zubillaga)	943 78 28 00

**AUTOBUSORDUTEGIA**

ARRASATE	ARAMAIO	GASTEIZ
07:00	07:15	08:00
10:00*	10:15	
11:00	11:15	
12:00*	12:15*	13:00
15:15	15:30	16:15
17:20	17:35	
18:30*	18:45	
20:30	20:45	21:25
21:00*	21:15	

GASTEIZ	ARAMAIO	ARRASATE
	07:50	08:05
08:15	09:00	09:15
	10:15*	10:30
	11:15	11:30
13:10	13:55	14:10
16:20	17:05	17:20
	17:35	17:50
	18:45*	19:00
19:30	20:00	20:15

**OHARRA:** izartxoia duten orduetan eskaeraren arabera zerbitzua eskaintzen dute. Auzoetako bizilagunei zuzendutakoa da, eta autobusa erabili gura badute, bezperan deitu beharko dute honako zenbaki honetara: 629 54 59 23

**OHARRAK**

**BAÑERAREN PARTIDUAK**

Beste astebetez, emaitza onak ekarri dituzte etxera Bañerako bi taldeek: neskek Francisco de Vitoria taldeari 3-2 irabazi zioten; Bañerako ordezkarien esanetan, antzera samar jokatu zuten bi taldeek eta edozeinek irabaz zezakeen. Mutilen kasuan, berriz, 1-0 irabazi zuten, baina partidua jokatu barik; izan ere, aurkaria —La Milagrosa taldea— ez zen azaldu. Datorren asteburuan, berriz, neskek Fumikoni taldea izango dute aurrez aurre Artziniegan, 11:30ean. Eta mutilen etxean jokatu dute, Jesus Obreroren kontra, 11:00etan.

**BARIKUKO ZINEMA**

Edward Zwick zuzendaria-  
ren *El último samurai* filma emango dute. Tom Cruise, Timothy Spall, Ken Watanabe, Tony Goldwyn eta Billy Connolly dira aktoreetako batzuk. Gogoratu maiatzean saioak 22:00etan izango direla.

**DOMEKAKO ZINEMA**

Oraingo honetan, *Master and Commander* abenturazko filma emango dute.

# Nortasuna sendotzen dihardu Ataka musika talde jaioberriak

U.M.

**Orain dela gutxi Sakre taldea aurkeztu genizuen. Orain, herriko beste talde bat aurkeztuko dizuegu: Ataka. Ez daramate denbora luzerik talde moduan, baina dagoeneko igo dira taula gainera euren musika jotzeko. Halako gehiago egitea espero dute, gainera.**

Ataka honako hauek osatzen dute: Martin Arriolabengoak (gitarra-jolea), Ibai Ormaetxeak (baxua), Iker Beitiak (abeslaria) eta Iker Agirrek (bateria-jolea).

Orain dela urtebete jaio zen Ataka. Iazko abuztuan. Baina taldea sortzeko ideia lehenagokoa da. Martinek gitarra jotzen zuela-eta, gainerako hirurekin bat egin eta hala erabaki zuten taldea sortzea. Martinek erakutsi die musikaren oinarriak eta dagoeneko euren kantuak eta guzti egin dituzte: "Gehienbat bertsoiak jotzen ditugu; gure kantu batzuk baditugu, baina gehienbat bertsoiak". Ramones, Los Violadores, Animales Muertos, Los Inhumanos... taldeen bertsoiak dituztela kontatu digute. Euren kantuen gainean, berriz, zera adierazi digute: "Hiru kantu idatzita ditugu, *intro* bat eta beste biren gaineko ideia ere badugu".



Aramaion ospatutako Lehenengo Gazte Egunean kontzertua egin zuen Ataka taldeak aurreneko aldiz.

Gaurkotasunean oinarritu dira euren kantuak idazteko. Kantuetako bat Udalaren eta gazte lokalen gainekoa dela esan digute; beste bat kanabisaren gainekoa eta hirugarrena, berriz, politikaren gainekoa.

Aramaioko I. Gazte Egunean estreinatu zen Ataka. Zera kontatu digute: "Jendea oso gustura

atera zen. Dena dela, aurreneko kontzertua izanda normala da, koadrilakoak zeuden..." Edozelan ere, taldekideek eurek ere kontzertuaren gaineko inpresio ona zutela esan ziguten: "Lehenengo aldiz izateko, txarto ere ez".

Bestalde, aurrera begira dituzten egitasmoen gainean, diote denborak duela azkeneko hitza:


"Orain ikasketak ere badaude, azterketak... Ahal denean ibiltzen gara taldean. Edozelan ere, orain jo egin behar dugu; gure kantu batzuk egin, eta jo". Horren harira, esan digute akaso herriko jaietan joko dutela. Bestela, kontzerturen bat antolatzeke interesa duenak hortxe dauka beste talde bat aukeran: Ataka.

# KZGunearen egutegia aldatu egin dute, Aramaioko eskaeraren arabera

U.M.

**Aramaioko KZGunea ez da herritar askorik joan orain arte. Hori ikusita, inguruko KZGuneen koordinatzaile Berex Ortiz Aramaion izan da, KZGunearen etorkizuna aztertzen. Hala, Aramaioko zentroan bestelako plangintza egingo dutela kontatu digu berak.**

Aramaioarren bat zein beste nabigatzera joaten da herriko KZGunea. Baina, bestela, ikastaroetan-eta ez da jende askorik ibili, batez ere azkenaldian. Hala kontatu digu Berex Ortizek. Gauzak horrela, eta KZGunearen erabilera egokitu nahian, beste plangintza bat abiaraziko dute Aramaioko KZGunean. Zera kontatu digu Berex Ortizek: "Zerbitzu berekin segituko dugu, baina ez da tutoretza iraunkorrik egongo. Hamabost egunean behin pertsona bat etorriko da begiratzera ea jendeak KZGunerako izena eman duen; zein ikastarotan izena eman duen... Eta horren arabera, jendea baldin badugu, ikastaroak



Liburutegiaren ordutegi berarekin zabalduko dute orain KZGunea.

egingo ditugu, eta bestela, ez. Gutxieneko talde bat sortu beharko da ikastaroak egiteko. Eta ikastaroen ordutegiari dagokionez, eskaeraren arabera erabakiko dute noiz egin ikastarook. Horrez gain, informazioa laga dugu KZGunean: zein ikastaro

ematen ditugun, izen-emate orriak...". Izan ere, KZGunea erabiltzeko dauden baldintza baka-  
rrak bi dira: 18 urtetik gorakoa izatea eta KZGunean izena ematea. Horrez gainera, zera ere gogorarazi digu Berex Ortizek: "Baditugu arauak; ezin da txa-

teatu edo jolastu, adibidez; ezin da sexuarekin lotutako web orri-  
rik ikusi... Ez da zentro ludikoa. Informazioa bilatzeko eta irakaskuntzan oinarritutako zerbitzua da".

Zentroaren plangintza aldatzeaz gain, Aramaion dauden zortzi ordenagailuetatik lau eraman egingo dituztela ere esan digu Berex Ortizek.

Hala, hemendik aurrera honako egutegia eta ordutegia izango du KZGunea: egunero zabalik, liburutegiaren ordutegi berarekin: 17:00-19:30era. Liburuzaina arduratuko da zentroaz. Hala, zelanbait, zentroa Udalaren ardurapean geratuko da. Baina ez da bestelako aldaketarik izango, KZGuneak betiko eskaintza egiten segituko du-eta: Interneten nabigazioa eta ikastaroak. Eta ikastaroen artean, zerrenda luzea dago aukeran: Internet erabiltzeko oinarritzko ikastaroa, justiziaren gainekoa, nekazaritza, irudi digitalen tratamendua, bidaiekin lotutakoak... Guztiak ere, eta KZGunearen gainerako zerbitzuak moduan, doan dira.